

EMRIP-imit inassuteqaatit naapertorlugit, Kalaallit Nunaanni nunap inoqqaavi "Inuit" paasissutissat tunngavigalugit nalunaarsorneqartalernissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Naalakkersuisut Siulittaasuat)

Akissuteqaat

(Naalakkersuisut Siulittaasuat)

Siullermeerneqarnera

Aallarniutigalugu Inatsisartuni ilaasortap Pele Brobergip, Naleraq, siunnersuuteqarneranut qujaffigerusuppara.

Naalagaaffiit Peqatigiit aamma nunani tamalaani inuit pisinnaatitaaffii pillugit suliniaqatigiiffiit allat Kalaallit Nunaanni iliuuserineqartariaqartunut iliuuseqarsimanginneq pillugu qisuariartariaqartut Pele Brobergip siunnersuummini tunngavilersuutigaa.

Nunani tamani innuttaasut nalunaarsorneqartarput taamaattorli innuttaasut nalunaarsorneqarneri nunap inatsisitigut aammalu nunat tamat akornani inissisimanagera aallaavigalugu ingerlanneqartarluni. Innuttaasunik suaassuseq, inuiaassuseq, upperisaqarnerlu aallaavigalugit immikkoortitsineq naalakkersuisuniit akuerinngilarput. Naalakkersuisuniit Kalaallit Nunaat innuttaminik aquneqarnissaa siulersorneqarnissaalu illersugaraarput tamat oqartussaaqataanerata aqqani. Innuttaasunut pisinnaatitaaffiliilluni pisussaaffiliisunillu inatsiseqarpugut. Ilaatigut pisinnaatitaaffiit nunatsinnut attuumassuteqarnermik aallaaveqarput amerlanertigullu Kalaallit Nunaanni ukiuni aalajangersimasuni najugaqarsimaneq aallaavigisarlugu.

Innuttaasulli Kalaallit Nunatsinni najugaqartut tamarmik illersorneqartussaapput innuttaasunilli nalunaarsueriaaseq qanoq siunissami isikkoqarumaarnissaa tunngaviumik inatsiseqarnissaq pillugu oqallinnermi aalajangiinermilu pisussaavoq. Kikkut innuttaassuseqassanersut, qanoq innuttaassuseqartoqalersinnaanersoq innuttaassuseqanngitsullu qanoq pisinnaatitaaffeqassanersut innuttaasuniit oqallisigineqarlutillu aalajangiiffigineqartussaapput.

Siunnersuuteqartoq EMRIP-ip inassuteqaataanut innersuussivoq. Nalunaarusiaq Naalagaaffiit Peqatigiit maajip ulluisa 30ani 2023 saqqummiussaani paasissutissanik katersineq agguanerlu pillugit innersuussuteqaatitaqarpoq. Innersuussinermi inuit inoqqaavi pillugit paasissutissat katersorneqarsimasut immikkoortiterlugit agguaneq pineqarpoq. Nunap inoqqaavi inuiaqatit, nunaminertat nunallu pisuussutaat pillugit paasissutissat tunngavigalugit aqutsinnaanissaat qulakkeerniarnera siunertaavoq.

Siunnersuuteqartup tunngavilersuutimini eqqaavaa, nunap inoqqaavisa "Inuit" immikkut paasissutissatut nalunaarsuisoqartariaqarneq pillugu ICC-mi siulittaasoq nalunaarsuteqarsimasoq. Siunnersuutip tusarniaassutiginerani ICC International-imiit akissuteqarnermi ICC Kalaallit Nunaat ICC-International-iluunniit "Inuit nalunaarsorsimaffiat" ("Inuit register") eqqaasimangisaannarsimagaat erseqqissaatigineqarpoq... Paasissutissanulli pisinnaatitaaffeqarneq pillugu oqariartuuteqarsimallutik, tassani Inuit paasissutissanut killilersugaanngitsumik pisinnaatitaaffeqarnissaat pineqarluni.

Paasissutissanik katersineq Naalagaaffiit Peqatigiinniit nunat inoqqaavinut tunngatillugit suliaqartumit, soorlu EMRIP-mit inassuteqaatigineqartoq, naligiinngissutsit aqqiiffiginarlugit

ilisimasanillu nutaanik pissarsiniarluni suliniuteqarnissaq siunertaralugu inuit pisinnaatitaaffiiniq atuinermi naligiinnigissutaasinnaasut paasiniarlugit paasissutissanik immikkoortiterineq eqqarsaatigalugu nunat inoqqaavisa pisinnaatitaaffiinit tunngassuteqarnera isiginiarneqassaaq. Taamaattumik agguinermut atatillugu inassuteqaat "Inuit" nalunaarsorneqalernissaannut tunngassuteqanngilaq.

Naalackersuisuniit isumaqarpugut Inatsimmut Tunngaviusumut suliaqarnermi oqallinnermilu innuttaassuseqarneq aallaavigalugu nalunaarsuineq qanoq isikkoqassanersoq sammineqartariaqartoq, tassanilu Kalaallit Nunaata Tunngaviusumik Inatsisaa innuttaasunit akuerineqarsimasoq malillugu nalunaarsuisoqassasoq.

Nunatsinni nammineq qaffasissumik ilinniarfinnik peqarpugut katersugaasiveqarlutalu. Tassani nammineerluta sinaakkusiussatsinnik nunarput nunattalu oqaluttuarisaanera pillugu paasissutissanik katersineq ingerlanneqarpoq inuiaqatigiit namminerisamik aqutsinerannut tunngavileeqataasunik. Oqaluttuarisaaneq, nunamik pisuussutinillu atuneq aammalu inooriaatsitsinnut paasissutissat katersorneqarput taakkulu ammasumik atorneqarsinnaallutik. Taamaattumik Nalagaaffiit Peqatigiit saqqummersitaani paasissutissanik katersinissamik inassuteqaat ingerlanneqareerpoq inuiaqatigiinnilu ingerlaatitsinni paasissutissat katersorneqartut atorneqareerlutik.

Taamaammatt Inatsisartut aalajangiiffigisassaattut siunnersuutip itigartitsissutigineqarnissaa Naalackersuisut inassutigaat.